

UTeM Perluas Program TVET JELITA ke Uzbekistan

Oleh Nur Syafiqah Mohd Jemmi - 13 February 2025



KUALA LUMPUR – Universiti Teknikal Malaysia Melaka (UTeM) bakal memperluaskan program Pendidikan dan Latihan Teknikal dan Vokasional (TVET) khas untuk wanita, JELITA (Job Empowerment by Learning and Inclusive Technical Advancement), ke Uzbekistan.

Naib Canselor UTeM, Datuk Dr Massila Kamalrudin berkata, langkah ini adalah sebahagian daripada usaha memperkukuh kerjasama dengan institusi pendidikan tinggi di Uzbekistan.

Menurutnya, negara itu menunjukkan minat terhadap program TVET JELITA yang telah berjaya di Malaysia sejak diperkenalkan pada 2023.

“Kerjasama ini bukan sahaja memperkukuh TVET JELITA, tetapi turut melibatkan bidang akademik, penyelidikan, pertukaran staf dan pelajar, serta pembangunan edupelancongan yang dijangka merancakkan sektor pelancongan Melaka.

“Selain itu, produk inovasi dari ketiga-tiga universiti berpotensi dikomersialkan melalui projek *spin-off* bersama.

“Inisiatif ini bukan sahaja memanfaatkan sektor pendidikan tetapi juga menyumbang kepada pembangunan ekonomi dan teknologi kedua-dua negara,” katanya dalam kenyataan, hari ini.

Majlis Menandatangani Surat Niat (LoI) antara UTeM dan dua universiti Uzbekistan, iaitu Tashkent University of Information Technologies (TUIT) serta Bukhara Engineering and Technological Institute (BETI), diadakan di Kampus Induk UTeM, Durian Tunggal, baru-baru ini.

Tambahnya, negara itu telah lama menunjukkan minat terhadap program TVET JELITA sejak diperkenalkan pada 2023.

“Kerjasama ini bukan sekadar berkisar kepada pendidikan tinggi, tetapi turut mengukuhkan hubungan diplomatik antara Malaysia dan Uzbekistan,” ujarnya. – MalaysiaGazette